



**KESATUAN KAKITANGAN SOKONGAN SATU
INTERNATIONAL ISLAMIC UNIVERSITY, MALAYSIA (KESATU)**

*(Ditubuhkan di bawah Akta Kesatuan Sekerja 1959, No. Pendaftaran : 1039)
d/a Kulliyah Of Engineering, UIAM Gombak,
P.O. BOX 10, 50728 KUALA LUMPUR, MALAYSIA
Tel. : 03-61964564 H.P: 019-2992043*

**TABUNG KEBAJIKAN KESATUAN KESATUAN KAKITANGAN SOKONGAN SATU
INTERNATIONAL ISLAMIC UNIVERSITY, MALAYSIA (KESATU)**

PERATURAN TAMBAHAN TABUNG KEBAJIKAN

KESATUAN KESATUAN KAKITANGAN SOKONGAN SATU INTERNATIONAL ISLAMIC UNIVERSITY, MALAYSIA (KESATU)

1. NAMA

Tabung ini hendaklah dinamakan Tabung Kebajikan Kesatuan Kakitangan Sokongan Satu International Islamic University, Malaysia. Tabung kebajikan ini hendaklah disebut selepas ini sebagai “Tabung” dan Kesatuan Kakitangan Sokongan Satu International Islamic University, Malaysia “Kesatuan” sahaja.

2. TUJUAN

Tabung ini ditubuhkan adalah bagi tujuan-tujuan berikut:-

- (i) Untuk membolehkan penama ahli atau waris ahli yang sah mendapat bantuan apabila berlaku kematian ahli itu.
- (ii) Untuk memberi faedah bantuan kepada ahli-ahli semasa keluarga ahli berkenaan ditimpa musibah kematian.

3. AHLI

- (i) Semua ahli Kesatuan ini dengan sendirinya menjadi ahli tabung ini.
- (ii) Seseorang yang memohon untuk **berhenti daripada menjadi ahli** Kesatuan dengan sendirinya terhenti dari menjadi ahli Tabung ini. Seseorang ahli yang **terhutang yurannya selama 3 bulan atau lebih tidak layak menerima apa-apa faedah** yang ditentukan dalam peraturan-peraturan ini.

4. KEWANGAN

- (i) Tiap-tiap ahli dikenakan yuran kebajikan sebanyak RM1.00 (Ringgit Malaysia : Satu Ringgit Sahaja) sebulan daripada yuran keahlian menurut Peraturan 4(1), Peraturan Kesatuan. Pungutan ini hendaklah diperuntukkan dan dipindahkan kepada Tabung ini tidak lewat dari hari yang ke 14 pada bulan yang berikutnya.
- (ii) Semua wang yang dipungut untuk Tabung ini hendaklah digunakan untuk membayar :-

- (a) Faedah Kematian ahli-ahli;
- (b) Faedah bagi ahli yang ditimpa musibah kematian ahli Keluarga.
- (iii) Bayaran faedah dan bantuan tersebut dalam Peraturan 4(ii) di atas hendaklah dibuat mengikut kadar dan cara-cara sebagaimana yang ditentukan dalam Peraturan Tambahan ini.
- (iv) Jika Tabung ini tidak digunakan sepenuhnya dalam sesuatu tahun kewangan, bakinya hendaklah dikekalkan di dalam Tabung ini dan dikendalikan dalam satu akaun berasingan.

5. PENTADBIRAN

Tabung ini hendaklah ditadbir oleh Majlis Jawatankuasa Kesatuan.

6. SIMPANAN BANK

Semua wang Tabung ini hendaklah disimpan di dalam Bank yang dicadangkan oleh Majlis Jawatankuasa Kerja , atas nama **Tabung Kebajikan KESATU**, dan kira-kiranya hendaklah diselenggarakan bersama-sama oleh Presiden, Setiausaha dan Bendahari Kesatuan.

7. REKOD-REKOD

- (i) Bendahari hendaklah menyediakan dan menyimpan Buku Kira-Kira yang Berasingan bagi Tabung ini.
- (ii) Buku-buku yang berikut hendaklah diselenggarakan oleh Bendahari:-
 - (a) Sebuah Buku Tunai;
 - (b) Sebuah Daftar Penama;
 - (c) Sebuah Daftar pemohon-pemohon faedah kematian yang menunjukkan nama dan butir-butir pemohon;
 - (d) Buku-buku lain yang difikirkan perlu oleh Majlis Jawatankuasa Agung.
- (iii) Setiausaha Kesatuan hendaklah menyelenggara segala surat menyurat berkenaan dengan Tabung ini.

8. PENAMA

Tiap-tiap ahli Tabung ini hendaklah melantik seorang penama. Satu borang penama seperti yang ditentukan oleh Majlis Jawatankuasa Kerja . Segala pertukaran penama itu hendaklah diberitahu dengan segera kepada Setiausaha Kehormat . Jika tidak ada penama yang dilantik, wang faedah itu hendaklah dibayar kepada waris ahli yang sah disisi undang-undang.

9. KELAYAKAN MENDAPAT FAEDAH

Tertaluk pada peraturan 3(i),3(ii) Peraturan-Peraturan Tambahan ini, semua faedah dibawah peraturan-peraturan ini ahli itu telah menjadi ahli Kesatuan ini dengan tidak putus-putus selama enam bulan (6) bulan.

10. PEMBAYARAN FAEDAH KEMATIAN AHLI

Apabila mati seseorang ahli Kesatuan ini, penama atau waris itu sebagaimana yang ditentukan di bawah Peraturan 8 .Peraturan Tambahan ini akan dibayar faedah sebanyak RM 100.00 (RM: Satu Ratus Sahaja). Faedah kematian dibawah peraturan-peraturan ini tidak boleh dibayar kecuali ahli itu telah menjadi ahli Kesatuan ini dengan tidak putus-putus selama enam (6) bulan.

(i) Permohonan untuk faedah kematian ini hendaklah dibuat dengan seberapa segera setelah berlaku kematian seseorang ahli itu dan pembayaran faedah hendaklah dibuat tidak lewat dari satu bulan setelah permohonan diterima.

(ii) Tiap-tiap permohonan hendaklah disokong dengan sijil perakuan mati.

11. FAEDAH BAGI AHLI YANG DITIMPA MUSIBAH KEMATIAN AHLI KELUARGA

Seseorang ahli Kesatuan yang ditimpa musibah dengan kematian dikalangan ahli keluarga iaitu **pasangan ahli, anak-anak ahli dan ibu bapa ahli** layak mendapat faedah daripada pihak Kesatuan . Jumlah faedah yang akan dibayar adalah RM 100.00 (Ringgit Malaysia : Satu Ratus Sahaja) dan tidak lebih daripada RM 200.00 (Ringgit Malaysia : Dua Ratus Sahaja) pada sesuatu masa, jika bilangan kematian ahli keluarga serentak pada masa yang sama atau pun kematian ahli keluarga berturut-turut pada bulan yang sama melebihi dari satu kematian. Faedah kematian dibawah peraturan-peraturan ini tidak boleh dibayar kecuali ahli itu telah menjadi ahli Kesatuan ini dengan tidak putus-putus selama enam (6) bulan.

(i) Permohonan untuk faedah kematian ini hendaklah dibuat dengan seberapa segera setelah berlaku kematian dikalangan ahli keluarga iaitu pasangan ahli, anak-anak ahli dan ibu bapa ahli dan pembayaran faedah hendaklah dibuat tidak lewat dari satu bulan setelah permohonan diterima.

(ii) Tiap-tiap permohonan hendaklah disokong dengan sijil perakuan mati.

12. SUMBER KEWANGAN

Sumber utama kewangan Tabung Kebajikan KESATU adalah dari caruman bulanan ahli melalui potongan gaji. Tiap-tiap ahli dikenakan yuran bulanan keahlian sebanyak RM5.00

(Ringgit Malaysia : Lima Ringgit Sahaja) sebulan menurut Peraturan 4(1), Peraturan Peraturan Kesatuan.

Sebahagian dari yuran bulanan keahlian iaitu Sebanyak RM1.00 (Ringgit Malaysia : Satu

Ringgit Sahaja) dari pungutan yuran bulanan ini hendaklah diperuntukkan dan dipindahkan

ke Tabung ini tidak lewat dari hari yang ke -14 pada bulan yang berikutnya. Kedudukan kewangan Tabung Kebajikan KESATU (jika perlu) akan ditambah melalui aktiviti-aktiviti tertentu dari masa ke semasa. Sumbangan Derma daripada orang perseorangan, persatuan/NGO, syarikat-syarikat, atau bantuan kebajikan dalam kampus juga akan diterima untuk mengukuhkan lagi kewangan Tabung Kebajikan KESATU ini.

13. TUNTUTAN

Semua tuntutan hendaklah menggunakan Borang Tuntutan Biro Kebajikan dengan mengemukakan salinan dokumen yang disahkan oleh Majikan/ Presiden / Setiausaha Kehormat/Staff Kategori A dan lain yang setaraf dengannya

14. AUDIT

Kira-kira Tabung ini hendaklah diaudit dengan cara yang sama mengikut kehendak Peraturan 15 dan Peraturan 16 Peraturan-Peraturan tubuh Kesatuan.

15. PERKARA-PERKARA YANG TIDAK DINYATAKAN DALAM PERATURAN TAMBAHAN

Keputusan Majlis Jawatankuasa Kerja adalah muktamad mengenai perkara-perkara yang tidak dinyatakan dalam peraturan tambahan ini melainkan jika dibatalkan oleh Persidangan Mesyuarat Agung Kesatuan.

16. PERBELANJAAN PENTADBIRAN

Wang dari Tabung ini hanya boleh digunakan bagi membayar faedah kematian ahli dan faedah ahli yang ditimpa musibah kematian ahli keluarga mengikut syarat-syarat yang dinyatakan dalam peraturan tambahan ini. Segala perbelanjaan berhubung dengan pentadbiran Tabung ini hendaklah dibayar dari Tabung Yuran Bulanan Kesatuan.

17. PENAMBAHAN DAN PINDAAN PERATURAN TAMBAHAN

Penambahan atau pindaan kepada peraturan tambahan ini tidak boleh dibuat melainkan dengan mengikut Peraturan 24 dari Peraturan-Peraturan tubuh Kesatuan dan segala tambahan atau pindaan ini tidak boleh dikuatkuasakan sehingga didaftarkan oleh Ketua Pengarah Kesatuan Sekerja.

18. PEMBUBARAN

Jika Majlis Jawatankuasa berpendapat bahawa disebabkan oleh kedudukan kewangan Tabung ini atau dengan lain-lain sebab Tabung ini tidak boleh lagi diteruskan, maka satu ketetapan bagi pembubarannya akan diambil dengan undi sulit oleh semua ahli yang berhak. Tabung ini tidak boleh dibubarkan dengan sukarela kecuali dengan persetujuan 75% dari ahli-ahli yang berhak mengundi. Apabila Tabung ini dibubarkan, segala tanggungan dan hutangnya hendaklah diselesaikan dengan bakinya, jika ada, hendaklah dipindahkan kepada Tabung Yuran Bulanan Kesatuan.

Nota : Diluluskan dalam persidangan Mesyuarat Agung KESATU kali ke V pada 29.11.2016
Berkuatkuasa dari tarikh 14.06.2017 (Kelulusan JHEKS)